

I. Moktek er tial hong

A moktek er tiang el hong a rulletrir ar jurors el mo medengeli a cherrengelel a teletelel me a ultutelel a deruchellir el jurors. Ng mo smaod a bebil er a tekoi me a teletelel a ureor el ulsbechall er a court, e dirrek el mesterir a bebil er a uldasu el ngosueterir ar jurors er tial kmal klou a ultutelel el ngerachel buai.

Ng diak a ngii dil ngerang el nga er a chelsel tiang el hong el jurors a mo ngmai el uai al chomesodel a llach el bo lousbech el kirel a ngii dil case el tir a oureor el kirel. Ngkel judge el mo orrengeles er a case a mo chodereder a tekoi er a llach el mor sel jury el kirel seikid el case el le ngar ngii. Ar jurors a kirir el di oltirakl aikel kuk mlechedederer el tekoi er a llach el mor tir el mla er a judge el kirel seikid el ulterkokl el case.

II. Ultutelel a Ureor ra Jury

Ar jurors chobang a kmal klou a belkul el deruchall er a tekoi er a kerkeriil er a beluu er a Belau. A omengeluolu me a osebecheklel a lemelted me a ilmokl el de ngar ngii a meketmokl loku a kltalreng er a ureor er a delongelel a judge me a jury, el tir al dak el oureor lolab chosisiu el blakelreng, e totaut a uldelid el lemelted er a rechuodel el mei. A judge a merritel a tekoi er a llach lulsbechall er a case e a jury a merritel a klemerang el techel a tekoi. Me sel le uaisei, ngoiak a klou a ultutelel el teletael, e ar jurors a mo uldimukl er a blai er a Kerkeriil.

Ar jurors a kirir el sechal me a redil lolab a uldelolm el uldasu el kirel a bichel a tekoi, mui el lemalt me a mui el tabesul el omeruul. Ar jurors cholngeseu el kirel chosebecheklel a tekoi er a llach e smisiich a lemalt me a tabesul blekeradel er a delongelir ar bek el chad. Sel kot el ngar bab el chetengakl el mor tir sel klemedengei er tir el kmo te kildmeklii tiang el ngerachel lobang a klaumerang e kildmeklii el mor sel ungil urebetellel.

III. Blai er a Kerkeriil

A lsekum ke mengilt el mo juror er a Kerkeriil er a beluu er a Belau, e ke mo mengilt el mo oureor er a criminal case, ultutakl el kirel a telmellel a llach. A oumesind er a ikaikid el ultutakl el

mor medal a Supreme Court er a beluu er Belau a kirel a telmellel a lechul a meknig it el kar me a kodellel a chad.

IV. Ultutakl

A chad el mlotutakl el kirel a telmellel a llach a okedongall el defendant. A ultutakl el kirel a defendant a meketmokl loku a information.

A information a ngklel a ultutakl el meluches er a babier el kirel a defendant el Attorney General me a lechub e ng Special Prosecutor a mengetmokl er ngii.

A uriul er al mekedmokl a information, e a defendant a mor medal a Kerkeriil e a Kerkeriil a mo ouchais er a defendant er a ultutakl el kirel e oker er ngii el kmo ng kongei me a lechub e ng omtok er a ultutakl. A ngklel tiakid el teletael a arraignment.

Ng diak el bo er ngii a trial a lsekum a defendant a diak lomtok er a ultutakl e kongei el kirel a telmellel a llach. E ng di lsekum a defendant a omtok er a ultutakl, e ng mochar ngii a trial.

Ngkel judge er a case el kirel a telmellel a llach a mo ouchais er a jury el kirel a tekoi er llach. A jury a kirel el mo merritel el kmo ng ngerang a klemerang el techel a tekoi. Ng ultuil er sei, e a jury a di kirel mo chomiich el kmo a defendant ng tilmellii me a lechub e ng dimlak el temelii a tang ma tang er a ikel ultutakl el kirel a telmellel a llach. A ikel mo choiak uriul el tekoi a diak el kirel a jury el omdasu le ng kmal di ngerchelel a judge. A tang er a tekoi a kmo, sel mo kelebsengel a chad a diak el bol siseb er a uldesuel a jury sel loureor el lomiiich el kmo chad ng mo tmaut er a llach me a lechub e ng mengubet.

A jury a kirel merritel aikang el kakerous el ultutakl el mo er a defendant el blibii, ngara tang el mo er a tang, e a uriul e ng mo michii el kmo a chad: ng mengubet er a rokui el ultutakl, ng mutaut er a rokui el ultutak, me a lechub e ng tmaut er a bebil e kuk mengubet er a bebil.

V. Voir Dire Examination

Se el bo lomuchel a jury trial, e a panel el ngii a cheldellir a rechad el sebecherir el mo jurors a mo mokedong el mo er a courtroom. Chelsel tiaikid el panel e ngar ngii a ulterkokl el ildisir a rechad el mo mengilt el tirkel mo chorrenge er a case. Te ngar ngii ar jurors el dirrek el mo mengilt el tir tirkel mo omtechei er ar jurors el mo diak el sebecherir el rukui a ngerchelir er a jury.

Tirkang el chad el ngar tiang el panel a mo mechedaol el kirir el mo onger a ker el merritel el kmo ng sebecherir el mo jurors er a case me a lechub e ng diak. A ngklel tiakid el teletael er a nger ma ker a voir dire. Tiang el omerritel loeak a nger a longetmokl er ngii a judge e al bebil er a taem e te soiiseb er ngii a rechad er a llach. Ng sebechel mor ngii a meringel el blals el mo er a chad el dulii a diak el klemerang el nger el mo er a ker.

Tiang el voir dire a omuchel lobengkel a kedeb el omesodel a case. A moktek er ngii a ouchais er ar jurors el kirel a ultutakl e dirrek el lolecholt er a rechad el nga er a ultutakl me a rechad er a llach er tir.

Ng mor ngii a ker el mo merritel el kmo ngar ngii a chad el ngar ngii a kangkester er ngii er a case me a lechub e ng medengeli a sebechel mo uchul e ng mo diak el lotebedii a melemalt el iuatash. A Kerkeriil a dirrek el soal el mo medengei el kmo ngar ngii a chad er tiang el panel el chedal me a lechub e ng kmal kaodengei ngii me a rechad el lulsiseb er tiang el case, rechad er a llach er tir, me a lechub e te chad el mo sioning er a temel a trial. A bebil er a ker a mo merritel el kmo ngar ngii a chedal tiang el panel el ngar ngii a kora omeleakl el reng er ngii me a lechub e ng tekoi el ngara rengul el sebechel mesiulii er a rolel otebedel a iuatash er ngii. Ngii dil juror el ngar ngii a lodengei el kirel a case a kirel smodii el mo er a judge.

A rechad el ngar tiang el ultutakl, tirkel loltutakl me ar melubet, a sebecherir el olengit me a chad a mengubet er seikid el ulterkokl el jury. A ngklel a ikaikid el chongit me a lechub e ng klisiich er omelubet el chad er a jury a challenges.

Ng sebechel a chad el mongit el tuobed er a jury loeak a cause, ungil luchul, a lsekum a nger me a ker a ochotii el kmo ng sebechel el kora omekbitang. A judge a mo chotebdii a chad er a panel a lsekum ng kmal ngar ngii a ungil uchul. Ng diak a telkelel a ildisel a ikaikid el chongit el loltobed er a rechad er a jury loeak a cause.

Ar chedal tiang el ultutakl a dirrek el ngar ngii a ulterkol el ildisel a klisichir el loltobed er a rechad er a jury el di diak a ungil luchul. A ikang a doleker el peremptory challenges. A rechad el melubet me a rechad el loltutakl a diul ngar ngii a ulterkokl el ildisel a peremptory challenge er tir. A peremptory challenge a llemalt lokuu a llach el mesterir a bitang me a bitang a techall el melilt sel lomeob er a jury. Ar jurors a kirir el mo medengei el kmo sel le mengubet er a jury lokuu a peremptory challenge e ng kmal diak el ultuil er a dechal a chad.

VI. Cheledaol er ar Jurors

A uchei er a voir dire, e a jury panel a mo nguu a cheledaol e mo kongei el ouchais a klemerang. Uriul er a rekil a voir dire, e ar jurors el milengilt el mo orrenge er a ultutakl a mo mechedaol.

Tiaikid e ar jurors a mo dechor e chodars a kedekmel chimorir. Te mo chemau a judge me a lechub a clerk el ngii a mo chomesterir a cheledaol. Ngkaikid el chad er a Kerkeriil a mo mekekokil e dulii el meketeklii tiang el cheledaol. Ar jurors a mo ochotii loiak a nger er tir me a ikal uldars el chimorir el kmo te mla nguu tiang el cheledaol.

Tirkel jurors el kuk diak el sorir el melai er a cheledaol a sebecherir el kuk di mo kongei el melekoi a klemerang.

VII. Cheiai el Telengtengil a Kerkeriil

A trial a mo melemolem sel blal mechedaol a jury. Ng blechoel ngar ngii cheiai el telengtengil a trial el kirel a telmellel a llach. A ikakid a beldeklel:

- (1) A rechad er a llach a mo chotobed a opening statements er tir. Al bebil er a taem e a imong me a lechub e te betok el chad el ngara ultutakl a chemoit a ikal opening statements er tir.
- (2) A oltutakl a mo oltobed er ar sioning me a sioko er tir el mo melisiich e choltaut er a ultuteklir.
- (3) A mlotutakl a sebechel kuk oltobed er ar sioning me a sioko.
- (4) A oltutakl a sebechel lemuut el loltobed er ar sioning el mo melangeb me a lechub e ng melemall a cheldechederir tirkel mle sioning er a mlotutakl.
- (5) A rechad er a llach a mo kmung a ulebongel cheldechederir el kirel a ultutakl.
- (6) A judge a mo choderderii a jury el kirel a tekoi er a llach.

(7) A jury a merael e mo omuchel el mesaod er a ultutakl el kirel a mo iuatash.

(8) A jury a tibir e chotebdii a iuatash.

Sel temel a kerkeriil, e a rechad er a llach a sebecherir loker a ker er a sioning el mlokedong er a bitang.

Sel lultaut a kerkeriil e ng sebechel a judge el mo mongit er mederir ar jurors el mo chotebedii a tekingel el kirel a ker er a llach. Oumesind el taem e a ikal ker a kirel a ultok er a cheldechedechal a sioning el loltutakl me a lechub e ng mlotutakl a soal loltobed. Al bebil er a taem e a judge a mo olengit er ar jurors me te tuobed er a courtroom el telkib el taem e a rechad er a llach a mo mesaod el loldubech me a lechub e tomekeuad a ikaikid el ultok. A llach a msang a ngerchelel a judge el merritel e oltobed er a tekingel el kirel a ikaikid el ker el kirel a tekoi er a llach.

Sel tekingel a judge el lotebedii a diak el bol belkul a kmo ng cholab el mo er a ngii dil techang. Ng di belkul a kmo, a dultuil er a llach e ng sebechel a tokubets el ker me a lechub e ng nger el mengai me a lechub e ng soiiseb.

Ng sebechel a judge el bek el taem el lotebedii a tekingel el kirel a ultok e ng di mo ungil er a oltutakl me a lechub e ng kuk di ungil er a mlotutakl. E ng di ng diak el belkul a kmo a jury a kirel mo chotebedii a iuatash el dirrek el mo ungil er ngii.

A juror a ngiluu a cheledaol el mo merritel er a case “el ultuiil er a llach me a sioko.” A llach a sel loterkeklii a judge. A sioko a uldimukl er a cheldechederir ar sioning me a ikel mlodars el mo er a kerkeriil e mlengai el mo sioko. A ikel sioko el sebecherir ar jurors el omes a mo ultuil er a llechul a sioko.

VIII. Ulebongel el Cheldechederir a Rechad er a Llach

A uriul er al tobed a sioko, e a rechad er a llach a mor ngii a techellir el mo mesaod lokuu a ikel ulebongel el cheldechederir. Tiang a ngosueterir ar jurors el dobedebek a cheldechederir ar mle sioning el sebechel mla remiid er a uldesuir.

A klou el moktek er a ikang el ulebongel el cheldecheduch a mo chomades a sioko el ngara ungil e bleketakl el teletael. A rechad er a llach a mo chodekdak a kakerous el cheldechederir ar mle sioning e chomekbuk a techel a tekoi el omeob a ikal ulebongel el cheldechederir.

Ng kirem el medengei el kmo a chad er a llach a mo cholecholt er sel teletelel a case el ngii a mo kot el ungil el kirel a chad el lomtechei er ngii. Sel lomtechei er ngii a chad er a llach a melemalt e klemerang er a chosengel ngii el chad er a llach. A ikel tekoi el le dung a tal chad er a llach a sebechel di mo medangeb er a ikel kuk bol dung ngkel tara chad er a llach.

IX. Omengedereder er a Jury

Sel bo longedereder er ngii a judge el mo er a jury er a Palau Supreme Court a kirel a tekoi er a llach. A judge a mo chochotii a llach el ngar ngii a okesiul el mo er a ikel techel a tekoi el mlocholt el mo er ar jurors.

Ng ngerchelel a jury el di ngii el oterkeklii el kmo ngerang a klemerang el techel a tekoi. E tiang a meketmokl lultuil er a sioko. A iuatash a moterkokl el diak lultuil er a uldesuel a judge el kirel a techel a tekoi el kmo ng uangerang, e ng di de nguu er a tekoi er a llach e ngii el judge a mengedereder.

X. Iuatash er a Jury

Sel de nguu er a ultutakl el kirel a telmellel a llach, e ng ngerchelel a jury el mo smiik e oterkokl a klemerang el techel a tekoi el ultuil er a llach el judge a childereder el mo er a jury. Sel mo moterkokl a ultuil er a sioko el tuobed, e seikid el loterkeklii a jury el kirel a klemerang el techel a tekoi a blechoel ngii a mo ulebongel.

XI. Teletael er a Chelsel a Courtroom

A kerkeriil a omuchel sel chad er a Kerkeriil le bekodongii el mo omuchel. A rokui el chad el nga er a chelsel a mo dechor. A judge a mo nguu a kingellel, e ngkel chad er a Kerkeriil a mo ouchais er a uchelel a kerkeriil. A chosisiu el omeruul a dirrek el mekedmokl sel kuk bo lolengull a Kerkeriil.

A ungil omeruul me a omelengmes a ungil teletael el loltirakl ar jurors. Ng diak a juror el sebechel mengui a simbung me a magazine er a chysel a courtroom. Ng dirrek el diak a juror el mengedecheduch er a tang er a juror er a temel a kerkeriil. Ar jurors a sebechir el cholab a imelir el ralm e ng di ng diak el sebecherir el mengang a kall me a lechub te melamech er a chysel a blai er a Kerkeriil.

Ar jurors a mor tir a ungil lomerruul loku omelat. A ikel mo ungil er tir a mo mekedmokl sel le sebechel mekedmokl. Ng kirir el subedii a judge el kirel a ngii dil ngerang el melemall er tir er a urerir, e kirir el subedii a Kerkeriil er a ngii dil ngerang el bkais chemrungel e chorechudel el tekoi loku a lluches el babier el le nguu el msang a marshal me a lechub e ng clerk. Al bor ngii a bkais chemrungel e chorechudel el kirel a tal juror, e ng sebechel suumech a tekingel el mo er a judge loku a ngii dil chad er a Kerkeriil me a lechub e ng olengit el mengedecheduch er a judge.

XII. Blekerdelel a Jury er a temel a kerkeriil

Ar jurors a kirir el kmal lomtab a cheldechederir ar sioning. Te ngmai a cheledaol el kirir el chemoit a ikel omeliakl el reng er tir me a omekbitang el teletael e mo chotirakl a tekingel a Kerkeriil. Ng kirir el otebedii a iuatash loltirakl er sel kot el ngar bab el duch er tir er a chomerritel me a bichel a tekoi, el ultuil er a klemerang el techel a tekoi me a llach el judge a childereder.

A tang me a tang el juror a kirel di mededaes a uldesuel. A teletelir a rechad a ochotii el kmo a chad sel tal le tibir a uldesuel er a dirk uchelel a tekoi, e ng mo meringel er ngii a melodech er a uldesuel er a uriul. Me a leuaisei, e ng ungil el mo er ar jurors a lak lolasem el meruul a uldesuir el kirel a case el di merko le mocholt a rokui el sioko el mor tir me a llach el ngar ngii okesiul er a ultutakl le mesaod el mor tir. Chosisiu el taem, ar jurors a diak losaod er a case lobengkel a ngii dil chad, me a dirrek a chysel a delongelir, el di merko bol merek a kerkeriil.

Sel temel a kerkeriil e a jury a sebechel mo remenges a chomelekoi me a chokesiu el kirel a llechul a sioko. A bebil er a ikal llach a sebechel kmal kora ngodech el tekoi el mo er a chad el diak el chad er a llach. E ng di ngii el llach a rokui el di ngar ngii a moktek er ngii. A ikang el llach a mla chobeob er a chysel a derdart el rak el loku a betok el mla ngar ngii el ultutakl.

Tiang el ultutakl el mla omuchel a diak el sioko er tial case. A cheldechederir a rechad er a llach er a uchelel me a ulebengelel a kerkeriil meng diak el sioko, el di ua ikel kerrir a rechad er a llach el diak el sioko. A juror a diak el kirel lomtab a tekingel a chad er a llach el meldung er a

chelsel a kerkeriil el ngii a dirkak el moterkokl el kmo ng klemerang el tekoi el lultuil er a sioko. A juror a dirrek el diak el kirel lomtab a tekingel a chad er a llach el kirel a tekoi er a llach a lsekum me ng diak losisiu ngii me a ikel le silaod a judge.

Ar jurors a kirir el ousbech a rokui el blal suub, ikel di lodengei me a uldesuir, me a klaomedengei er tir. E ng di ng diak el bo lultuil er a ngodech e ileakl el tekoi er a di bedengir. Me a leuaisei, e ng kirir el kerekikl el sel temel a kerkeriil e ng diak losaod er a case er a blai me a lechub a ngii dil ker. A tekoi el le renges ar jurors el di choiak a bedengir a sebechel el diak el mui el klemerang, chomekbitang me a lechub e ng cheleuid. E sebechel el diak a ultutelel er a case el ngar mederir. Meng uaisei e ng di, ng melemalt e ta besul a rechad el ulsiseb er tial case al bor ngii a techellir el mo medengei el dung a uldesuir el kirel a tekoi el ngar er ngii a ultutelel er a case.

A lsekum e ng duubech er a temel a kerkeriil el juror a mo medengei er a kmung ker a bebil er a tekoi el kirel a ultutakl, e ng kirel louchais er a Kerkeriil lokuu a babier el mo er a clerk. E ngii el juror a diak el kirel louchais er ngii el tekoi er a chelsel a jury room.

A tang me a tang el juror a diak el dil ngii el mo omes er a basio el dilubech a ngii dil tekoi el ngii a uldimukl er a case. A lsekum e ng mo ulsbechall chosengel, e a judge a mo oldurokl er tir el mong er a basio el tmak el rokui el mong.

Ar jurors a kmal diak el kirir el mesaod er a case lobenterir a rechad el diak el ngar er a jury, el mo lmuut er ar becherir me a lechub a rechad er a blirir, e kmal diak el kirir el menguii a chisel ngii el case er a simbung. Ng kirir el mengeroid er tir er a rasio me a *tv* el sebechel el mo mesaod er tiang el case. A iuatash er a jury a kmal kirel diak el bo lultuil er a ngii dil ngerang e kmal di mo ultuil er a sioko me a llach el mlodars el mor tir er a chelsel a Kerkeriil.

A choiietel a ikal llach a di ulterkokl el bai mo uchul a rrau el reng el mo er a juror. Ng sebechel mo meringel el lobii er a chelsel a uldesuel a tang el chad a cheldechedechal a sioning er a chelsel a Kerkeriil me a kuk tekoi el mengai lokuu a ngodech el rolel.

Ar jurors a diak el kirir el mededengchokl, mededchor me a lechub e te mesesilil er a basio er a Kerkeriil el ua ikel loraer er ngii a rechad me a lechub e ng siseball el mo er a court. Ng sebechel mo uchul e ng mor ngii a klaseues me a cheldecheduc er a ikal basio el lobenterir a rechad el semeriar me a lechub e te chelsechusem er a case el uai a rechad er a simbung me a lechub e te sioning er a case. A lsekum e ng ngar ngii a *badge* el le besterir ar jurors e ng kmal kirel di ulsbechall er a bek el taem.

A lsekum a ngii dil ngodech el chad a melasm el mengedecheduch er a juror el kirel a case el juror a oureor er ngii, e ngkel juror a kirel:

- (1) Subedii ngkel chad el kmo ng diak el melemalt er a juror el mesaod er a case me a lechub e ng melai a ngii dil tekoi el ngodech er a ikel nga er a chelsel a kerkeriil;
- (2) Kotouar e diak lorrenses er ngii el chad a lsekum e ng di muri;
- (3) Ouchais er tial lomeruul er a judge er a mereched el taem.

Ar jurors a choridrir el diak losaod a ngii dil ngerang- me a lak el kirel a case- lobenterir a a rechad er a llach, sioning me a lechub e ng chad el lulsiseb er a case. A chouai tiang el omeruul a sebechel mo uchul e ng mo omuchel a beches el kerkeriil.

A bebil er a case a sebechel muchel a betok el omesaod er a beluu. Sel bol uaisei e ng sebechel a jury el di mo cheldull el di merkol tobed a iuatash. Tiang el lomeruul a ulsbechall el kirel chosebecheklir ar jurors er a ngii dil omengeuid el tekoi er a ikrel a Kerkeriil.

XIII. Chelsel a Jury Room

Sel de nguu er a chelsel a Belau, a uriul er a blal mechedereder a jury er a tekoi er a llach me a kuk di ngodech el tekoi el kirir el loltirakl e bol siseb er a jury room, e ar jurors a mo ngiltii ngkel mo mengeteklir.

Ngkel mengeteklir a mo choungerachel a ikel lomesaod er tir el kirel a ultutakl e kirel mesterir ar bek el jurors a ta besul el techall el mo kmung a ikel nga er a uldesuir.

A Ita ng kekerous a uchul e totebedii a iuatash, ng di ng kirir el rokui el kongei er seikid el iuatash.

Ar jurors a ngar ngii a ngerchelir el msang a techall e mengull er a tang er a juror er a kuk uldesuel. Ng ngerchelir el mo oterkeklii a iuatash sel le sebecherir. E ng di, ng diak a juror el kirel choitii a uldesuel el ngii choumerrang er ngii el kmo ng melemalt.

Ar chedal a jury a milchedaol el mo chomiich el kirel a klemerang el tekoi er a ulterkokl el case. Ng diak a ngerchelir el omdasu er sel mo chongingil tial case. Te mo tomellii a cheledaol el le ngiluu a lsekum te mo tibir a tekoi lultuil er a kmong ngerang el ngii a sebechel mo mengodech me a lechub e ng metemall el kirel a chad el mlotutakl me a lechub a ngii dil ngodech el tekoi.

XIV. Uriul er a Kerkeriil

A uriul er a lotebdii a iuatash ar jurors e a Judge le bechitirir me lorael, e te mla mo mimokl el melemolem a ikel le blechoel meruul. Ng diak el ngerchelir me a lechub el kirir el mesaod er a case el mo er a ngii dil chad e sebecherir el kotouar el mengedecheduch me a lechub e te melekoi a uldesuir. Ng dirrek el sebecherir el mengedecheduch er a rechad a lsekum e ng sorir. Me ng uaisei e ng di, a Kerkeriil a sebechel lotebdii a tekingel er a kuk tokubets el chimong el case el tomer er a juror me sel taem el longedecheduch el mesaod er a case e ng diak el bo louchais a ngii dil ngerang el kirel a sengkyo er a kuk tang er a juror.

XV. Ulebongel

Ar jurors a kirir el melemalt e choba llomes el reng el mo uchul e te michii a case el mo ungil. Ng kirir el ngar ngii er tir a melemalt el reng me a omeruul me a dirrek a ungil duch er a omelilt. Tiang el ureor er a jury a ultuil er a ikaikid el blekeradel. E a ikaikid a mo uchul e ng sebechel melemolem a klisichel a ureor er a jury.

Ar jurors a churungel a ngerchelir sel lorritel a klemerang el techel a tekoi e lousbech a llach el diak el lomekbitang. Ng diak el kirir el lolab el mo er a merau me a lechub a chebuul. Ng kirel el tabesul a omerellir el mo er a sechal me a redil, meklou el kombalii me a di derstal chad. A tabesul llemalt a mo er a rokui el chad el diak el lultuil er a kmo ng chad er ker el beluu, chiro er a chad, klechelid er ngii me a lechub a kmo ng sechal ng redil.

A ureor er a jury el mekedmokl a ngar bab el ngerachel er a buai el mekedmokl. A meringel el ureor a di ngii lobang a chetengakl sel le mekedmokl a klou a ultutelel el ureor el kmal mlo ungil. Ng diak a lemuut el ngar bab el ureor el sebechel a di chad er a beluu el kudmeklii el lolengeseu er a amt el uai a mui e melemalt el ureor er a jury.

Sel cholechotel me a klungiolel a chorretel a beluu loiak a ulekerreu me a uldesuir a rubdois el chad a mocholt lokiu a melemalt el reng, duch me a llomes el reng, me sel cherrungel el ungial a rechad er a beluu me a klechi Belau er tir er ar jurors el tir a oureor er a chelsel a Kerkeriil.